



**UP, Uttarakhand & Punjab election
nung BSP kija tokteptsü: Mayawati**

**Tottenham-i £75m agi
Savinho alizükogo**



VOL. XXIII ISSUE NO. 314 (ADOK 314) DIMAPUR RASEMNÜ (WEDNESDAY) LUROI (AUGUST) 26, 2026

₹ 5.00

Nagaland Police tsüngdang ken o benoktsü zübatsü atema online complaint portal ka sayatsü

Kohima, August 25, 2026 (TYO): Nagaland Police-i taruba anogo 10-12 tsüngda single-window complaint portal ka sayatsü ta Director General of Police Rupin Sharma-i ashi.

Iba portal ajanga nisungtemi online ajanga ken o benoktsü, item ken o tem koba tashi aoer metettsü aser police inquiry reports angutsü ta pai ashi.

Kohima nung tetsürtem aser tanurtem dak tashiyim inyakba atema senden ka nung jembidang DGP Rupin-i ashiba agi iba system ajanga nisungtemi civil mesüra criminal süang police tsüngdang ken o benoktetsü.

Iba system kübok police station nung benokba ken o shia atema officer-in-charge ajanga investigating officer ka shima mapa nungloktsütsü. Iba ketdangsüri ken o ji cognisable offence, non-cognisable offence mesüra civil dispute bendangtsü.

Ken o ji cognisable offence süra police station-i FIR ka benoktsü, non-cognisable offence süra magistrate dangi aotsü aser civil süra police medeni bentettsü ashitsü ta Rupin Sharma-isa ashi.

Ken o benokertemi online ajanga osang metettsü aser



criminal laws tasen kübok police-i inquiry asüba report download asütsü akok. Police station jenjang nungi DGP tashi ken o tem nung tenük yoka reprangtsü akok ta paisa ashi.

Iba system ajanga tetsürtem aser tanurtem kanga ajangzüksü aser zübazüba ken o tem benoktetsü ta DGP Rupin-isa ashi. "Nenoki benokba ken o tem odangbo meyutsütsü" ta paisa shisem.

Sorkar telatetbatem aser itemji mapa kuma inyakba nung ongdang keta lir aser programmes o agencies aika liaka tang aliba maparen ajanga meperir ta pai ashi.

Paisa takoksa ajururtem aser public dang ola madoki malitsü ayongzükogo. Ozüng alema inyakshangshiba osang ketdangpur dang mashiba ajanga khuret jungjunga mangateter ta pai ashi.

Police-i civil disputes nung teka metettsü aser recovery agents ama meinyaktettsü saka ozüng alema inyakshangshiba atemabo police-i tebang aittsü akok ta Rupin-isa ashi.

Paisa NGOs, village councils, sobaliba rejutem aser tanga civil society groups-i ozüng mapa meinyaktsü tekümdangtsü metetdaksü.

Nagaland nung taoba financial year tsüngda tetsürtem dak tashiyim inyakba ken o 311 benoka liasü aser Women Helpline nung ken o 144 aru ta Social Welfare Director Tosheli Zhimomi-i ashi.

Mission Vatsalya kübok 2025-26 tsüngda Child Welfare Committees dangi ken o 640 arua liasü. Kasa mapang Juvenile Justice Boards tsündang ken o 56 benoka liasü ta Zhimomi-isa ashi.

Nagaland nung Child Care

Institutions balala nung tanur 639 lir ta laisa ashi.

September 1, 2023 aser March 25, 2026 tsüngda Child Helpline 1098 dangi ken o 2,632 arua liasü.

Item ken o tem reprangdangra Department kijai dangbo tetsürtem aser tanurtem dak tashiyim inyakba mekoktetsü sayur. Anungji Social Welfare, police, legal services authorities, district administrations, NGOs aser tanga sendaktepertem külemi amalitepa iba khuret azüoktsü nüngdaker ta Zhimomi-isa metetdaksü.

Mission Shakti aser Beti Bachao Beti Padhao kübok Social Welfare Department-i Nagaland nung school ajak nung sanitary vending machines aser grievance-redressal "SHE" boxes agütsütsü sentong lir. Iba ya Nagaland Police aser Police Headquarters den yaritepa

inyaktsü ta laisa ashi.

Mission Shakti aser Mission Vatsalya ya Nagaland nung district 17 prong nung tenzüka inyaker. Mission Shakti ajanga Women Helpline 181, One-Stop Centres aser Shakti Sadan services agütsür.

Mission Vatsalya kübok District Child Protection Units, Child Welfare Committees, Juvenile Justice Boards, Child Care Institutions aser 24-hour Child Helpline 1098 dena lir.

"Mission Shakti aser Mission Vatsalya ya balaka inyakba moutettsü anungji police, District Legal Services Authorities aser NGOs-i shilem agütsüla" ta Additional Secretary Olemjungla Aier-i ashi.

Tetsürtem aser tanurtem dak tashiyim inyakba ken o tem atema first responders ji police lir aser legal services authorities-i legal aid agütsür aser NGOs ajanga sorkar o lokti tsüngda apu alar ta lai ashi.

Department of Social Welfare, GoN kübok Mission Vatsalya aser Mission Shakti ajanga state-level convergence meeting ayonga amen. Iba sentong ya Nagaland Police aser Nagaland State Legal Services Authority (NSLSA) den yaritepa ayongzük.

Dimapur nungi samaba tanur Agartala nung angu



Agartala, August 25, 2026 (Agencies): Dimapur kübok Neisatuo Colony nungi samaba tanur ka Agartala nungi Assam Rifles sepaitemi kümzükogo.

Iba tanur ya arishi küm 10 tain Joseph Mao lir aser pa Dimapur nungi pa kija train ka nung mener lia August 23 nü Assam Rifles sepaia kati angu.

Rifleman Lawrance Hrangkhawli-i tanubosang ya school bag ka bener pa kisüng dang aliba angu aser pa dang asüngdangya asüduang pa talidak tejangja mesüra pai kechiba train nung amen

meshitet.

Rifleman Hrangkhawli-i idangjisa par ketdangsürtem nem osang agütsü aser Agartala, Tripura nung Assam Rifles tesepe anir ao.

Assam Rifles sepaitemi osang bushitepa aodang tanubosang maitsü jangjatet aser par kibong bushiteta liasü.

Parnoki osang bushitepdang social media nung 'missing-person appeal' ka angu aser iba ajanga tanur maitsü jangjateter par tsüraburtem den tongtepratepa pa kümzüka aliba osang sangoktsü.

Nagaland nung Aug 26-29 tashi tzünglu arutsü

Dimapur, August 25, 2026 (TYO): Nagaland State Disaster Management Authority (NSDMA)-i August 26 nungi 29, 2026 tashi district telemsa tsüngsang-mopung osang metetdaksüogo.

August 26 nungi tzünglu aru tenzütsü aser August 29 tashi state kübok tesem balala nung yipru aita tzünglu arutsü.

August 26 nü Longleng, Mokokchung, Peren, Phek, Tsemnyu, Tuensang aser Wokha nung tsüngmok

atena aser tsüngi aia tzünglu arutsü imlarta NSDMA-i ashi.

August 27 nü tzünglu kanga arutsü aser talisa Longleng, Peren, Tsemnyu o Tuensang kübok tesem aika nung tzünglu arutsü ta parnoki ashi.

August 28 nü Nagaland kübok tesem balala nung yipru aita tzünglu arutsü imlar.

August 29 nü Longleng, Mokokchung, Mon, Peren, Tuensang aser Zunheboto district

tem den tanga tesem kar nung tzünglu arutsü ta NSDMA-isa metetdaksüogo.

August 26 nungi 29 tsüngda district balala nung tzünglu arutsü asadangtetba: Peren (93.83 mm), Mokokchung (88.83 mm), Longleng (83.98 mm), Tuensang (64.99 mm), Tsemnyu (63.58 mm), Wokha (58.38 mm), Phek (52.89 mm), Mon (51.53 mm), Dimapur (51.51 mm) aser Kohima 43.96 mm.

Manipur CSOs-i Census athitsü aser NRC update asütsü akhanger

Guwahati, August 25, 2026 (Agencies): Manipur nung civil society organisations (CSOs) 14 aser lokti lennirtemi Centre sorkar dang Census exercise athitsü aser National Register of Citizens (NRC) update asütsü mepishiogo.

Manipur nung delimitation exercise kecha magidang tamasa NRC update asütsüla ta parnoki akhanger.

14 CSO Kangleipak den Kabui Union Manipur, Kom Union Manipur, Rongmei Naga Manipur, Meitei Pangal Manipur aser IDP Manipur nungi lennirtemi Prime Minister's Office, Home Minister, Registrar General of India (RGI) aser Ministry of Home Affairs dangi shidi ka zülüogo.

Delimitation masüduang India sensotem jangjatsüla kechiyong Manipur nung alirtem taginüba

aser Centre lennirtem dang iba tebilemtsü lemsatepba nung ongdang tulu ka lir ta parnoki shidi nung shia lir.

Manipur tesem ajungalen NRC update asütsüla ta asüba takhangba agütsür aser Centre sorkari state nung alirtem den külemi "original Indian citizens" kümzüka ayutsüla ta parnokisa ashi.

Manipur nung citizen identification atema 1951 küm amshitsüla kechiyong Indian Union den madendang Manipur Constitution Act yanglu aser iba nung official gazette ka ajanga yimtsüngtem zülua lir. Manipur nung mezünguba democratic election nung iba kasa village aser population data amshi aser idangji kinajak nungi nübo 53 shimteta liasü ta parnokisa shidi nung shia lir.

Manipur nung bendangertem

atema entry aser exit pass system amshia liasü saka Manipur-i India nung adenba sülen taoba Chief Commissioner Himmat Singh-i November 18, 1950 nü iba inyakyim agien.

Manipur nung mezüngbuba Census aser NRC exercise ji 1951 nung inyak aser 1948 village list amshi. 1969 tashi Manipur ya single district ka ama dang liasü aser iba sülen districts 5 aser sub-divisions 25 lemsa aser idangji yimtsüng 1,947 liasü.

Parnokisa Kuki Zo Council aser Saikot MLA Paolienlal Haokip dang 1951 nungi 2011 tashi Census data asadangtsü ayongzükogo.

Iba ajanga CSOs aser lokti lennirtemi Census 2027 athitsü aser delimitation masüduang NRC update asütsü akhangba kuli jangjatsü ta parnokisa ashi.

Dimapur 24/7 ajanga HIV/AIDS awareness sentong ayongzük



Dimapur, Luroi/August 25 (TYO): Dimapur 24/7 Foundation ajanga District Integrated Strategy for HIV/AIDS (DISHA), Office of the Chief Medical Officer, Dimapur den lungjemer HIV/AIDS Awareness Programme ka Mongulbarnü Eden Higher Secondary School, Thilixu nung ayongzuka liasü.

Iba sentong ya Annie Jain, Chairperson, Dimapur 24/7 lenisüba kübok "Awareness Today, Protection for Tomorrow" omen nung ajemdaker agi, kong kaketshir

300 dak tema dena liasü.

Awareness session mapang Orenthung Ngullie, District Programme Officer (DPO), DISHA ajanga HIV tashidak menatepa aoba, nokdangba, tendangba aser osang aser teyari shidak bushiba indang jembia liasü.

Pai HIV/AIDS dak sendakba nung tai angatetba indang lemsatep aser HIV keter alirtem mesü-mokonga mesüra bendanga mamshitsüla, ta ashi.

Iba sülen kaketshir temi HIV/AIDS dak sendakba nung

jangjanüba tem asüngdanga liasü.

Lanurtem nem HIV/AIDS indang shisatsü aser osang shidak agüja angatetdaksütsü kanga tongtipang lir, ta Dimapur 24/7 ajanga ashi.

Parnoki Eden Higher Secondary School, DISHA aser Office of the Chief Medical Officer, Dimapur dang iba sentong nung amalitep akaba aser yaritepba atema pelaba lemsatepa liasü.

Dimapur 24/7-isa nüburtem asoshi maneni maparen balala inyaksü nükjidong lir ta ashi.

MMC-i azü registration cum vaccination drive agitsü

Dimapur, Luroi/August 25 (TYO): Mokokchung Municipal Council ajanga municipal tesem nung 2026-27 atema Dog Registration cum vaccination drive September 2-3, 2026 anogotem agitsü. Vaccination drive ya Department of Animal Husbandry & Veterinary Services aser AWUM den lungjemer agitsü, ta ADC & Chief Executive Officer, Mokokchung Municipal Council, Atsunga Walling-i sangdong ka nung metetdaksü.

Registration renewal cum vaccination ya anepdang 8:00 ako nungi tenzüksü, aser iba atema ward ajunga nung nüngdakba facilities anepalutsü

mepishir, ta ashi.

A.H & Veterinary Services Department team den külemi inyaksü atema ward shia nungi nisung ana-na shimtsüla, renewal atema registration card nung pei ward chairman ajanga meyongnem agütsütsü, ta ashi.

Taoba küm registration sülen dog tags agüja aliba ward temi kasaji office nungi meshitsüla aser taoba küm magütsü alirtemi kasaji amshitsü akok.

Samaba yong dog tags nüngdakba wards temi office nung arua August 27, 2026 tashinung tag tejangja agütsütsüla aser registration card ya office mapang August

27, 2026 nü meshitsüla, ta sangdong ajanga ashi.

Registration tasen, vaccination fee aser utilization charges akhi ama alitsü.

Iba drive ya September 2, 2026 nü Salangtem, Alempang, Alongmen, Sangtemla, Tongdentsuyong, Arkong, Penli, Dilong aser Sungkomen nung alitsü.

September 3, 2026 nü Yimyu, Lijaba Lijen, Mongsenbai, Kumlong, Kichutip, Aongza, Marepkong, Majakong aser Artang nung alitsü.

Osang tali tejangjaba metetner temi Dr. Wati. VAS den Mobile No. 9436007607 ajanga tongteprateptsü akok, ta MMC sangdong ajangasa ashi.

GPPK-i Kohima nung Balidan Diwas amung

Kohima, Luroi/August 25 (TYO): Saheed Major Durga Malla aser Saheed Captain Neikezhakuo Kenguruse nungeri takum bendanga agütsüba asoshi akhum aser tetushi agüja Balidan Diwas 2026 sentong Gorkha Public Panchayat Complex, Chandmari, Kohima nung Mongulbarnü agia liasü.

Iba sentong ya Gorkha Public Panchayat Kohima ajanga Gorkha Nagas, clubs aser Jatiya Sansthas den lungjemer ayongzuka liasü.

Tongti tesemdanger ama Deputy Commissioner, Kohima, B. Henok Buchem-i iba sentong nung jembidang, Martyrs' Day ya bilemtetba anogo kisüng masü saka linük asoshi takum bendanga agütsür tem bilemtetba, tenüngsang agütsüba aser parnoki inyakba nung temulung tali agütsüshiba mapang ka lir, ta ashi.

Tanü asenoki anguba

nüjiso, tesunep aser maongka balala ya zünger mezünga tetsür aser tebur temi takum bendanga agütsür pei jangraba dang linük temaba südaktsüba nungi yangerba lir, ta pai ashi.

Gorkha nunger dak tasü tait, yimya tajung, tashi angaba aser nübur tenzükbä yimyattem aliba indang DC Buchem-i ashi aser linük indang defence aser security tsütsü shilem tajung agiba aser Nagaland nunga talisa Kohima nung loktiliba, sobaliba aser rongsenketzüng tsütsü mapa tajung inyakba atema pelaba lemsatepa liasü.

Buchem-i lanurtem dang linük asoshi takum bendanga agütsürtem takum nungi lesson angazüksü aser yimya tajung, ochi, temeim, tasü aitba aser külem nüburtem akhumtsüboa amshiba yimyattem adokdaksütsü ayongzuka liasü.

Linük asoshi takum bendanga agütsür nem

agütsütsü akhum tulutibaji tesunep, khuret angatetba, ajak adenba lokti tajung ka yangertsüba ya alitsü, anungji Kohima aser Nagaland nung Gorkha nunger tali lungjemer kati ka akumtsüboa alitsüla, ta pai ayongzük.

Iba sentong akhumdong, Deputy Registrar of Cooperative Societies, Cooperation Department, Nagaland, Bharati Chinhal aser asür Captain Neikezhakuo Kenguruse tebu Neisielie Kenguruse nungeria tayongzükba o jembia liasü.

Iba sentong nung Gorkha Public Panchayat Kohima Summer Camp 2026 nungi tanurtemi ken ka aten, GPPK tir Santu Thapa-i pela agizükba o jembi, Karishma Baraily-ia temeja ken ka aten aser advisor, Gorkha Public Panchayat Kohima, Ranjeet Lama-i melepzüng o jembia liasü.

Assembly atema Media aser Car Passes agütsütsü

Dimapur, Luroi/August 25 (TYO): Assembly Hall, Kohima nung Fourteenth Nagaland Legislative Assembly indang Session toku buba September 1, 2026 nü nungi tenzüksü aliba indang osang abentsü asoshi media aser car passes agütsütsü atema Directorate of Information & Public Relations (DIPR) ajanga sangdong ka agütsüogo.

Sangdong ajanga ashiba agi, passes ya print, digital aser electronic media houses nungi working journalists kija nem agütsütsü. Assembly

proceedings indang video clippings tem media houses temi asüngdangra DIPR ajanga agütsütsü, ta ashi.

Iba session indang osang abentsü tebilemba aliba osangbener temi pei tenüng, designation, organisation aser gari number densema osang t e j a n g j a iprnagaland@gmail.com dangi August 28, 2026 tashinung yoktsüla.

Anogo süyiba sülen item nüngdakbatem agütsüba magizüksü, ta Directorate ajanga metetdaksü.

Chümoukedima Town Council-i 'Swachh Hunters' tenzüker



Dimapur, Luroi/August 25 (TYO): Solid Waste Management (SWM) Rules, 2026 aser Plastic Waste Management (Amendment) Rules, 2026 nung aliba ama Chümoukedima Town Council-i Chümoukedima jila ya jana maliba, plastic maliba tesem kumdaksütsü nükjidong nung August 24, 2026 nü 'Swachh Hunters' sentong tenzükogo.

Iba sentong kübok Self-Employed Women Association (SEWA), Chumoukedima aser Chumoukedima Town Youth Organization ya 'Swachh Hunters' asütsü sangdongogo. Parnoki jila nung mürekmeju tajungba kumdaksütsü aser nüburtem nem jana ketdangsüba indang awareness

tajungba nung agütsütsü asoshi inyaksü.

Swachh Hunters temi mapang shia Chümoukedima Town nung aliba NG-29 densema kanga mazüngi aliba tesemtem aser CTC kübok tongtipang lenmangtem sema tongs amshia jana bendena nüburtem nem ngudaksütsü.

Swachh Hunters temi surveillance mapa inyakba den külemi nunglokja aliba street grids nung jana, bins sünger aliba, tzünglu tzü ayimba nokdanga aliba, ozüng alema jana indokba aser bendenba jangjateta senzütsü. Maneni aibelenba aser timtem adokba indang osangtem CTC nem agütsütsü aser parnoki tapet mera agitsü.

Kohima nung Pan-India Rescue and Rehabilitation Campaign tenzük

Dimapur, Luroi/August 25 (TYO): National Commission for Protection of Child Rights (NCPCR) ajanga linük tesem ajunga nung inyakba nung shilem ka ama Kohima District Task Force (DTF) on Child Labour ajanga August 24, 2026 nü Pan-India Rescue and Rehabilitation Campaign 4.0 tenzükogo.

Iba campaign nung shilem ka ama Kohima District nung aliba school tem nung August 24 nungi 28 tashi intensive awareness sentong ayongzuka kaketshir aser tesayur nem child labour, child rights aser education kota tongtipang ta asüba angatetdaksütsü.

August 25, 2026 tashinung awareness sentong ya Government Middle School (GMS) L. Khel, GMS P. Khel, GMS Merhulieta aser GMS New Minister's Hill nung agiogo aser DTF ajanga ano maneni school tem nung awareness sentong ya ayongzüksü.

Iba sentong nungya Child and Adolescent Labour (Prohibition and Regulation) Act nung aliba ozüngtem, talisa arishi küm 14

tekübok tanur nem mapa inyakdaksüba nokdangba aser arishi küm 14-18 tsüngta tanurtem temang nung timtem agütsüba mapa inyakdaksüba nungi nokdangba indang angazükdaksür.

Sentong nung shilem agirtem dang iba Act nung aibelener nem temerenshi balala agütsüba indang sayur.

Iba sentong nung tesayurtem dang school attendance kanga junga reprangtsü aser tanur ka anogo 15 ashitena school-i maruba lira ketdangsür nem osang agütsütsü ajungmesoa liasü.

Awareness campaign agiba sülen Kohima DTF-i iba ama nokdanga aliba mapa inyakba tanurtem kumzüksü asoshi inspection aser rescue operations agia jajar.

DTF-i nüburtem, schools aser tsürabortem dang iba campaign nung yariteptsü aser child labour indang osang agüja Kohima district nung child labour melidaksütsü nükjidong asangsang akumba nung teka amteper inyaksü ayongzuka liasü.

Patna nung kaketshirtem aser police tsüngda mangatettep adok



New Delhi, Luroi/August 25 (Agencies): 70buba Bihar Public Service Commission (BPSC) tatidang anema longkak aitba kaketshirtemi Mongolbarnü Patna nung Gandhi Maidan nungi Raj Bhavan leni aoba mapang police temi tenokdangba balala agütsür aliba nongpoka oa liasü. Parnoki iba tatidang ya athitsü asoshi takhangba agütsüdar.

Police temi aiben nokdangtsü merangkaka longkak aitertemi tenokdangba agütsür aliba tesemi aitsü meranga liasü. Tensa mejungi akümba sülen police-i kaketshirtem aika sota yuogo.

Longkak aita aliba kaketshirtemi Bihar chief minister indang ki longbangtsü merangba mapang police-i tenokdangba balala agütsür aliba nongpoka ao aser iba ajanga police-i parnok senshidaktsütsü atema water cannon tem amshitsüsa aküm.

Police-i longkak aitertem dang parnok tejakdangi aotsü memelatsü ta tekümdangtsü metetdaktsü. DSP Kamakhya Narayan Singh-i ashiba agi, ketdangsür tejentem den

sensaksem takok ngua kaogo aser kaketshirtemi longkak aitba anentsü imlar.

70buba BPSC tatidang paper leak asüba aser inyakyim nung meshidak lir ta shia longkak aitertemi iba tatidang ya athitsü khanga arudar. Parnokisa Teacher Recruitment Examination (TRE) 4.0 nung temelenshi bener arutsü takhangba agütsüogo, kong single-stage tatidang ka agitsüba aser negative marking agintsüba densema lir.

Congress leader Sushil Kumar shiba longkak aitba tesemi oa liasü pai ashiba agi, kaketshirtemi BPSC, Bihar Staff Selection Commission (BSSC) aser Sub-Inspector recruitment dak sendakba nung ken o ashishidar.

"Onoki kechi südir süaka TRE 4.0 atema single-stage tatidang ka agidaktsüner aser negative marking agintsüla," ta Kumar-i ANI dang ashi. Paisa, Chief Minister Nitish Kumar dang longkak aitertem den ajuruteptsü mepeshi aser ashiba agi, kaketshirtem anogo tekububa lumia longkak aitar.

Maneni kaketshirtemi TRE-

4 ya Bihar ajunga nung shilem ana kuma lemsar agitsü sentong aliba ya anema arudar aser official recruitment notification agütsütsü khangdar.

Kasa mapang nung Bihar nung Opposition lenir Tejashwi Yadav-i, Deputy Chief Minister Samrat Chaudhary dang longkak aitertem den sensaksem ka-a parnok takhangba bentettsütsü mepeshia shiti ka zülüogo.

Kaketshirtemi longkak aita aliba mapang Bihar sorkari Mongolbarnü, kaketshirtem tebilemtsü bentettsütsü atema 'Vidyarthi Sahyog Shivir' (student support camps) amenokba sangdongogo.

Iba camp ajanga kaketshirtem nem sorkar ketdangsürtem den parnok tebilemtsü indang indanga lemsateptsü asoshi maongka agütsütsü.

Kaketshirtemi online ajanga tashishibatem benoktetsü aser portal ka aser Helpline 1100 ajanga parnok tashishiba ya koba jenjang nung ali aji asadangtetsü, ta Choudhary-i ashi.

UP, Uttarakhand & Punjab election nung BSP kija tokteptsü: Mayawati

New Delhi, Luroi/August 25 (Agencies): Bahujan Samaj Party (BSP) tekolak Mayawati-i Mongolbarnü ashiba agi, Uttar Pradesh, Uttarakhand, aser Punjab nung taruba assembly election nung party shinga dena meloktepi kija tokteptsü.

"Tanga party den lokteper toktepba ajanga tokteptsü atema maongka mongui party züngsemtem tejangraba sama aoba nokdangtsü atema BSP pur 2027 küm Uttar Pradesh, Uttarakhand, aser Punjab assembly election nung tanga party den meloktepi tokteptsü," ta lai ashi.

Lucknow nung lar kidang Mongolbarnü senden ka amenba mapang lai Punjab assembly election atema renemshiba asadanga liasü.

Senden nung state asem nung ketdangpurtemi shilem agiogo.

"Punjab nung tang state yimsü süa aliba Aam Aadmi Party aser Congress o Bharatiya Janata Party (BJP) amala tanga party temi nüburtem tejangraba anema inyakba ajanga mepela aliba nüburtem asoshi BSP-i timla agütsütetsü," ta lai ashi.

BSP pur 2022 küm Uttar Pradesh aser Uttarakhand na nung parnok kija toktep. Punjab nung parnok Shiromani Akali Dal (SAD) den longjemer toktepa liasü.

Punjab nung BSP puri candidate 20 yok aser SAD pur menden 97 nungi toktepa liasü. Party-i menden ka akok aser SAD-i menden asem koka liasü. 2024 küm Lok Sabha election magi tsüngda February

13 nü BSP aser SAD na pila liasü.

2022 assembly election nung BSP pur Uttar Pradesh nung parnok kija toktep. Mayawati-i candidate 403 yok saka kati dang takok angu. Rasra assembly menden nungi MLA Umashankar Singh asüba sülen parnok assembly nung MLA ka danga mali.

Uttarakhand nunga menden 54 atema BSP-i candidate yok aser menden ana koka liasü.

Mongolbarnü senden nung Mayawati-i party lenirtem dang assembly election matong tsüngda booth level nung party akangshitsü tetuyuba agütsüba den, taruba election atema meranga inyakba aser ochishir candidate tem yoktsü nüngdakba nenshia metetdaktsüogo.

China tir Xi Jinping-i India semdangtsü akok

New Delhi, Luroi/August 25 (Agencies): China tir Xi Jinping-i yakta India semdangtsü imlar. Pai India semdangtsüba jangjara küm tenetshi nung tang mezüngbuba India semdang asütsü.

New Delhi nung BRICS Summit 2026 amenba mapang Xi-i India semdangtsü imlar, ta ken o jangja alirtemi HT dang ashi. Iba senden ya September 12 aser 13 nü amentsü.

2020 küm Galwan kübok arrtsü nung mangatettep adokba sülen India aser China na tang lenla balala nung tesendaktep yanglushitsü merangba mapang Xi-i India semdangtsü.

"China nunger ketdangsürtem hotel mekazüka ayutsü aser security inyakyimtem tembanga inyaktsü asoshi mazüngi inyakdar," ta ken o jangja aliba source kati Reuters dang ashi.

National security adviser Ajit Doval, special representatives senden ka asoshi tang China nung oa lir. Iba senden ya India aser China na arrtsü nung

mangatettep aliba sensaksemstü atema ayongzükbä lir.

Chinese Foreign Ministry sangdong ka ajanga ashiba agi, Doval aser foreign minister Wang Yi na arrtsü aser tanga ken o dak sendakba nung sensak asemstü.

Doval-i China semdangba aser Xi-i tang India semdangtsü aliba ajak ya linük ana tsüngda tesendaktep yanglushitsü merangba nung shilem ka lir.

India aser China na shishilembaba tsütsüa tesendaktep yanglushiogo aser Delhi aser Beijing na tsüngda tayimtsüa senzü tenzüko.

Maneni Ato Kiloner Narendra Modi-ia küm tenet tsüngda 2025 küm mezüngbuba Tianjin nung SCO Summit nung adentsü atema China-i oa liasü.

China semdangba mapang PM Modi aser Xi Jinping na bilateral senden ka amen aser akhümtsübu, tamang katetba aser kati ka tejangraba angateta inyaksangshiba dak ajemdaker tesendaktep yanglushitsü bangjema liasü.

Rajnath-i DRDO missile tech transfer asütsü temelaba agütsüogo



New Delhi, Luroi/August 25 (Agencies): Defence minister Rajnath Singh-i, Defence Research and Development Organisation (DRDO)-i yanglur aliba conventional missile system ajak atema technology tem, linük nung yanglutsü atema Indian defence company tem nem agütsütsü asoshi temelaba agütsüogo, ta Ministry of Defence-i Mongolbarnü ashi.

Linük nung missile tem taliba yanglutsü, tanga linük nungi missile tem bener aruba dak metaloker malitsü aser defence supply chain nung micro, small aser medium enterprises (MSMEs) tem densema domestic company tem nem shilem tali agidaktsütsü nükjidong nung iba jenjang ya agiogo.

Technology agütsüba ajanga temsüa aliba India nunger industry temi DRDO-i yanglur aliba conventional missile system tem yanglutsü asoshi temelaba agütsütsü, saka iba mapa inyaktsü atema company tem temsüa alitsüla, ta ministry-isa shisem.

2025 küm October ita HT-i, missiles, artillery shells, ammunition aser ordnance tem develop asütsü aser yanglutsü atema defence ministry-i private sector nem lenmang lapoktsüogo, ta metetdaktsür liasü.

Defence dak sendakba nung India tangar dak memetaloki alitsü atema merangba mapang

iba telemtetba agiba ajanga teyari tulu agütsütsü. Ministry-i ashiba agi, iba ajanga missile systems ya development stage nungi industrial-scale production-i ayaoka aitsü asoshi teyari agütsütsü aser kasa mapang nung India domestic defence industry akangshitsütsü.

India kidangertem missile capability jenjang ajungketshiba mapang tang iba jenjang ya agiogo.

July ita Centre for Aerospace Power and Strategic Studies (CAPSS)-i, Pakistan indang space capabilities atsülanga aoba aser talisa China teyari ajanga parnok tashi taitba akümba indang metetdaktsüogo.

Ken o asadangertemi ashiba agi, Pakistan indang Space & Upper Atmosphere Research Commission (SUPARCO)-i ita 16 tsüngda satellite trok yokogo. Parnoki ashiba agi, autonomous space-based surveillance capabilities aser integrate satellite intelligence akangshitsü atema Pakistan-i jenjang agidar.

India indang defence ecosystem nung private-sector nem tali shilem agidaktsütsü atema merangba nung tang iba temelaba agütsüba ya-a shilem ka asütsü. Tanga mapang dang nungi India-i 2024-25 küm defence nung sen timba entoka lakh crore 1.54 entokogo. Kasa mapang nung defence exports crore 23,622 jungogo.



TIR YIMYIM YIMOBILEM (EDITORIAL)

DIMAPUR WEDNESDAY, AUGUST (LUROI) 26, 2026

Ayong merükba putu!

Ayong akaba limatem ya temoatsü limatem lir, kechiyong ayong nungi tzü mesüa bener oa alu ayimer, electric light tashi agiteta agir, tzü nung khu abenba lenmang akümer aser ayong nung aliba tzü shirurutem ya asenok asoshi chiyongtsü tajung lir. Aji dang masü saka ayong akaba agi nisungtem dang masü saka arem shiruru aser ozü sangnu ajunga tzü ajemer aser ajak atema temang merükteta pelatepdakji ayong ya lir. Aji oda, ayong aliba agi temeket limatem mekongdaksür aser süngdonglidongtema topur junga aiener. Ajisüaka, nisungtem nütsüng nübo renloka aodang aser alima nung nisungtem nüngdak tapu balala purapiteta yangluteta amshi tenzükdang, nisungtemi chir aser agir mesüra amshir endokba agi janaona onsara kümer, item jagi ali tema aser arem dang masü saka ayongtem dena kanga menendaksütsüsa kümadok. Aji oda, asenoki mangatet nungji, asenok aika asoshi ayong ya janaona endokdak tesem tajung amai ka dang bilem, anungji asenok menüngdakba osettsüset, jana ona aser shiruru tasü mang dena asenoki ayong bushia oa endok. Ashiko, item janaonatem ayong nung endokbaji melamelaa ponger aotsüji ta asenoki bilema tamagitsü oset ajak ayong nungji tuoktsü südi. Iba tashiji dang asenok tangatetba liasü. Tetezü, asenok tangatetba shisa tenük agi iba alema oagiji mangu. Aji oda, asenoki ayong nung janaona endokba jagi ayong koda menener aser ayong nung aliba taküm sangnu koda kangshir aser asenoki ayong nung janaona endokba ponger alubaji kong komaka anentsü aser iba jagi alima meimchir nem takoksa bener arutsütsü asü marutsütsü (?) ta asübatemji tebilema mebilem. Asenokji, iba amaji tongmelang aser kecha memetet, anungji asenoksasa asenok yirutsüsa asenoki inyaker. Atangji, tanü temetetba aser tangatetba putu nunga asenokbo asaa mangtetli ta asür amato, tanüa asenok aikati janaona bendena bener oa ayong nung tuoktsür. Ibaji asenoki alima merüksü asoshi kanga junga inyaker amai bilemer, ajisüaka iba jagi ayong dang masü saka alima menentsür. Aji oda, asen kima kilong aser yimdongbo temerük saka item nung jagi janaona bendena bener oa ayong nung endokba agi ayong tasüng mica, plastic aser polythene agi meyibanger tzü nung aliba shirurutem taküm alitsü makoker. Ibaji dang masü saka asenoki ayong nung tuoktsüba janaonatem agi ayong nung tzü rusepdaksür aser tzunglurura ayong nung tzü sadema meyimettsüsa tzü lenmang nokdangba agi ayonglangleni tzü yima moulutet meyipa atuagi tzümetsüng akümer. Item timtem atalokba ya angur, ajangshir aser angatetba agi, tanübo alima aika nung nisungtemi ayong merüktetba sentong yanglua inyaker. Aji oda, India lima nunga nüngtugu ayong Ganga ayong amabo Union government-i sen crore lakh junga endoka merükteta inyaker. Iba amaji tanga ayongtema government-i sen agüja merüktetba sentong aika lir. Ajisüala, ashiko, asenokbo tang tashi government-i dena yimti nung janaona bendena bener oa ayong nungang tuokja alitsüa akok,. Aji oda, asenok aikati tang tashi ayong ya asenok asoshi kanga tongtibanga ta mangateti, tesem kar nung janaona agi, tesem kar nung ali mijang atuba agi, tesem kar nung factory nungi aluba mozü tzü agi aser tesem kar nungbo ango südaktsütsü mim mozü amshiba agi kanga mejungi, tapayutsüka, menendaksüdar asütsü. Itemji yimten aser loktii özüng magütsüyonga, peisasa angateter tangsa anentsüla, kechiyong tanü putu yabo ayong menendaksüba putu masü saka ayong merüktetba putu litr. Iba putu tangatetba tajung nung asenoka shilem agia ayong menendaksürtem masü saka ayong merüktetertem rongnung adentsüla.

OLEMSABANG

TEMESEPBA (ALCOHOLISM)

~ Mr. Maong Jamir,
Secretary, Finance and Property, ABAM

(Iba ocet ya Ao Theological Association (ATA)-i adokba Laishir Sangdong nung angutsü.)

(Yashi adok nungi...)

8. Primary Prevention kodang nüngdaker?

Primary Prevention agütsütsü tajungtiba zü ngajiküm 10 nungi 15 tsü ngda ya lir. Iba zü nga ya ajak tendangnüba, chidangnüba, jemdangnüba aser odangnüba mapang ka lir, aser tapet tesayuba magütsüba ajanga iba zü nga nung aika raksatsü tenzüker. Parnoki memeteti tendanger aser ibaji parnok asoshi yimya sübaba (habit) ka kümadoker. Tanü lanurtem dang yi mesüra mapa tamajungtemji temenen ta ashibaji dang masü; saka yi ajanga shi temang nung, kaketshisatsü bushiba nung, rongsen lenmang nung, kinunger aser tsürabur den tesendaktep aser lokti nung kechi timtemsa agütsür, item ajakji terasa tejangja agütsütsüla. Iba den külemialima tatalokba otsü, medical tsütsülen aser laishiba nungitapet tesayubaagütsütsü nüngdaker. Kodang tanurtemi iba tapet terasa tejangjaji angazükdir, parnok iba tangatetba nungi mepilatsü. Aji oda tanur karbo iba tangatetbaji liaka odang inyaksüa akok. Oda ibajibo memetetba mesüra mangatetba agi masü saka pa/la dak tebilemtsü kar aliba ajanga alitsü. Engraji nung iba dang "Informed Choices" ta ajar. Tetzü angateta/meteta lir, aser inyaksü/meinyaksüji pai/lai lemtettsü.

9. Shibai yi noktangba nung koma Inyaksüla?

- 1) NLTP act 1989 ya Governmenti akangshia inyaksüla. Iba mapa ya 'supply reduction aser primary prevention' mapa lir.
- 2) NLTP act 1989 dak rangloker yimtsüngtemnunga özüng tesashi alitsüla. Yimden-yimsüsürtemi aibelen masütsüla. Iba mapa ya 'supply reduction aser primary prevention' mapa lir.
- 3) Özüng takang liaka tesayuba magütsüra amajok. Anungji yi indang tapet tangatetba tanur aser tain ajak nem agütsütsüla. Iba ya 'demand reduction aser Primary prevention' mapa lir. Iba mapa ya Arogoi inyaksü tapet.
- 4) Pei lokti nung yi ajemer aika adokra, iba teraji bushntong Arogo aser yimden külemiyaritepba agütsütsüla. Iba mapa ya 'demand reduction aser secondary prevention' lir.
- 5) Nüngdakbapurtem Rehabilitationcenteri Arogo, Yimden aser lokti balala teyaritep nung yoktsüla. Iba mapa ya 'demand reduction aser secondary prevention' lir.
- 6) Item dak alaka Arogo, Yimden aser Lokti balalai asalentong balala yanglua 'supplyreductionAser demand reduction' asoshisentong balala pei yimtsüng mesüra lokti sasep nung inyaksüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Enforcement Directorate-i Rajasthan nung pastor ka ki meita ao

Jaipur, Luroi/August 25 (Agencies): India indang federal financial crime agency ajanga Rajasthan nung Protestant pastor ka den sendaktepa aliba tesem ana meita oa pai temelaba makai bendanglen nungi teyari sen aika meshia agi aser item sen amshia makamaiter tribal nisungtem aser Dalit Hindu nung tamangba yimsü melendaktsü ta tai tonglokja lir.

Enforcement Directorate ajanga August 22 nü sangdong ka agütsüba nung parnoki Hope Ministries India indang Pastor Ravi Mohan Pahadiya den sendaka aliba tesem ana nung meita bushi aser ozüng alema inyaksangshiba kuli aketba documents aser digital devices tem apu ta ashi.

Pahadiya-i Foreign Exchange Management Act, 1999 nung aibelen aser ozüng tsütsü temelaba magi sen 28.8 million (\$301,000) shi agizüka amshi ta ED-i aitsür. Item sen ya timba tamangba yimsü melendaktsüba nung amshi ta ashir.

ED-isa ashiba agi, Pahadiya aser par ministry ya Foreign Contribution (Regulation) Act, mesüra FCRA kübok registration tejangja mali, koba teyari mapa balala inyaktsü atema bendanglen nungi senotsü agitsü asoshi nüngdaker.

Rajasthan nung Bhil tribal nüburtem aser Dalit Valmiki kin tem tamangba yimsü melendaktsüba inyakyim nung Pahadiya dena lir ta agency-i ashir. Dalits nunger dang tamalen "Untouchables" ta aja aser India indang caste system nung parnok ya jenjang tajemzükba aser akhi alemli mapang nungi loktiliba aser tamangba yimsü tsütsü kanga bendanga amshia aru.

Ajisüaka Khristan lenirtemibo Rajasthan nung anti-conversion law renema agizükba sülen Khristanpur anema inyakba rongnung iba ya tesüsaba alitsü, kechiaser Pahadiya ya makamait tia nung aliba tanurtem asoshi inyaka aru ta ashir.

Rajasthan Prohibition of Unlawful Religious Conversion Act, 2025 ajanga tashiyim amshia, merenshia, tiazü yimyatem amshia, mesüzüka, kibong akumba mesüra ashikülak yimya amshia tamangba yimsü melendaktsütsü memelar.

Iba ozüng ya Hindu nationalist Bharatiya Janata Party indang sorkari 2025 küm August ita agizük aser ozüng alema tamangba yimsü melenba nung aitsür tem küm 20 tashi tepuokdak ayutsü aser senchi achitsü shia lir.

Lokti temulung meyipdaktsüba nung aitsürtem

arishi tepiyong tepuokdak ayutsü aser senchi sen 2.5 million (\$26,100) tashi achitsü. Maneni aibelener tem arishi tepiyong tepuokdak ayutsü aser senchi sen 5 million tashi achitsü shia lir.

Federal agency-i pastor anema tamangba yimsü melendaktsüba ken o benokba yagi Protestant ministry anema sentong yanglur inyakba ka lir ta jangja sayur," ta arogo lenir kati UCA News dang ashi.

"Tamangba yimsü melenba kuli lira, mezüngbuba nung anti-conversion law amshia pastor aser par ministry anema ken o benoka inyaktsüla," ta leniri ashi.

"Ministry-i mapa tajung inyakba tamangba yimsü melendaktsür ta tai tonglokja nokdangtsü mechi sang ka amai lir," ta ashi.

BJP-i yimsü asüba Rajasthan densema India nung state 13 nung anti-conversion laws yanglua amshir. Khristanpur aser Muslim nunger densema tamangba yimsü tsütsü kin tilatem dak tenük yoktsü atema iba ozüng ya amshir, ta iba ozüng anemer temi ashir.

Item ozüng anema Supreme Court nung ken o benoka aliba lokti tentet balala rongnung National Catholic Bishops' Conference of India dena lir.

ANOGO ABEN TSÜNGREM DEN

Nenok tetsübu

"Aser kodang nütsüngtemi Pa tzüyim ma nung jajayonga angu, parnoki aoksa-a ashi, yabo temenen tanela; aser parnoki tetsübu agi ayimten".
(Mathi 14:26).

Tanü asenok aika taküm nung tetsübu agi sünga lir. Asenoki asütsü, lendong, shirangtsü, sensak tia asoshi tsübur. David taküm nunga tetsübu liasü saka pai iba tetsübu agintsü asoshi leman ka dang aser ibaji Tsüngrem dak tamang akatsü, "Kodang ni tsübua bilemdir, ni pa dang amangtsü". David tenük pa mekütta aliba tensa nungi Tsüngrem dangi melenshi. Tamangi tetsübu ajak melenshitsür. T.Ken 56:11 nung ashir "Tsüngrem dak ni kü tamang yuogo, ni metsübuttsü, nisungi kü dang kechi inyaktet". Tetsübu talenba ajak nungi jenbua alibaji asen-i temulung katetta Tsüngrem dak tamang akaba sayur. Asen sasa tetsübu asoshi kecha meinyaktettsü akok saka Tsüngremibo ajak inyaktet. Aseni tetsübu anema kecha meinyaktettaka Pa dak amangba ajanga asen tetsübu samadaktsüba dang masü saka pa temulong chidaktsür (Ibri 11:6).

Künü anogo tebui par jabaso süngdong taru ka nung tua mena angu, aser iba süngdongji jabaso tua amenba ajanga tazüng nungji teküsüker dang liasü. Anungji tebui aritepba pa teka salar yangi pongzükang aser ni na ajungzüktsü ta ashi. Saka jabaso ken tatsüka tebui ashiba nung temulung melemtet. Kodang jabaso alilen reprangzüka yok süngdong tekusüker dang liasü. Anungji jabaso ashi, Oba kü tarendak aser tetsübu ajak toktsür ni ne teka nung kü taküm ajak agütsür. Asen kotak tebui asenok tarendak aser tetsübu ajak toktsür pa dak tamang katettsü asoshi akanger.

UP nung Deobar tekülem sentep nung timtem agütsü, tamanger 5 apu



Uttar Pradesh nung Kanpur yimti kübok tekülem ki ka nung Khristanpur sarasademba mapang tangokba noksa ka yangi angur.

Lucknow, Luroi/August 25 (Agencies): Uttar Pradesh nung Hindu nunger telok kati Deobarnü tekülem sentong agia alidak oa timtem agüja tamangba yimsü meyipdaktsür ta tai tongloksüba sülen police temi Khristanpur nisung pongu apu.

Iba timtem ya Prayagraj district kübok Kathauli yimsüng nung August 23 nü ataloka liasü.

Item nisung ya Vishwa Hindu Parishad (VHP or World

Hindu Council), parnok indang youth wing Bajrang Dal aser women's front Durga Vahini nungi lir ta parnoki ashi aser züngsem kar tekülem kidangi aita Deobar tekülem sentong agia aliba nung timtem agütsü.

Item nisungtem yagi onok merenshia amshi aser police jaok, ta iba tekülem sentep nung dena alir Khristanpuri ashir.

Iba district nungi police officer kati UCA News dang phone ajanga ashiba agi,

yim daklir kari iba tekülem kidang tashiyim amshia tamangba yimsü melendaktsür ta osang agütsü.

"Police temi iba tesem semdang aser nisung kar apu. Iba maparen bushisüngdangba mapang lir," ta pai ashi.

Uttar Pradesh nung aliba charity Unity in Compassion indang tongti zülur Minakshi Singh-i ashiba agi, state nung iba ama lokti arua timtem agütsüba tali kumogo, kechiaser Hindu

nungeri iba ama inyakba atema memerenshir.

"Sorkar aser police temi parnok anema meinyaker. Parnok kumzüka ayur aser timtem ajurur tem merenshir," ta lai ashi.

Bharatiya Janata Party (BJP) sorkar den sendaktepa aliba Hindu nunger telok temi parnok dak, parnok arogo aser tanga public institutions anema tamangba yimsü melendaktsür ta tiazü nung tai tonglokja tenük

yoker, ta UP nung Khristan lenirtemi ashir.

State tesem balala nung pastor tem densema tamanger 500 dak tema tepuokdak yua lir aser parnok anema 2021 küm yangluba anti-conversion law kübok ken o benoka lir.

Tamangba yimsü melendaktsü ta tai tongloksüba kisüng nung ajemdaker tekülem sentong nung timtem magütsütsüla aser tekülemertem maputsüla, ta Presecution Relief tenzüksang Shibu Thomas-i ashi.

"Onok tangatetba kanga tejangja. Tai tongloksüba ajunga indang-indanga aser ozüng nung aliba ama shidak bushisüngdangtsüla," ta Thomas-i UCA News dang August 24 nü ashi.

"Khristanpur aser parnok pastor tem tekülem sentong agitsü atema tesunep nung adenshir, saka tangbo parnok kanga tsübor," ta pai ashi.

India nung nütsüng yongsük timtiba Uttar Pradesh nungya lir (200 million dak tema) aser shilem 80 shi Hindu nunger lir.

India nung tamangba yimsü nung ajemdaker reshikangshia amshiba tesem tiyongji Uttar Pradesh ya lir ta züngshir, kong Khristanpur shilem ka majung aser Muslim nunger shilem 20 jungnüa lir.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Züpi

(n) zü adokli, au aser süngküm lanu mekutetli (young bamboo shoot)

* Arem nung züpi melepsatsütsüla.

Züpu

(n) sü nung arürlökba tzü shiruru terep temesüng (cowrie shells)

* Naga kin sü aika nung züpu arürlöker.

OLONG PAITEP # 76030

1		2			3		4		5
				6		7			
8									
						9			
			10						
11									12
					13		14		
15									
16							17		

TIPIEN

- Nüji masü - (4)
- Technütsüka - (6)
- Aketa shirangba - (5)
- Pi - (6)
- Amena - (5)
- Kinü - (5)
- Tanang masü - (5)
- Lenmang - (6)
- Nübo tedi - (5)
- Tuoshi - (6)
- Shiruru apuba temenatsü - (4)

LANGTSÜNGLEN

- Jila tulu - (5)
- Sarasademdang tembang - (4)
- Tarutsü indang ashirtem - (6)
- Alia - (5)
- Mojing - (5)
- Tai inyakba metet - (5)
- Medemer chijiba - (6)
- Tatokba / Amadok - (5)
- Anüngdang masü - (5)
- Jabaso masü - (4)

OLONG PAITEP # 76029 TELANGZÜBA**TIPIEN :**

- Tesangra, 5. Mungo, 7. Kisen,
- Salem, 12. Semki, 14. Kilem,
- Kensü, 16. Sangpang.

LANGTSÜNGLEN :

- Temesen, 2. Raksa, 3. Aon,
- Aso, 6. Nile, 9. Alizüng,
- Omen, 11. Lemta, 13. Ola,
- Kin.

NAI-A YA METETTER

Honor-i yanglutetba Humanoid robot Lightning ajanga Usain Bolt dang nungi 100-meter sprint tekaratiba asemtetba sülen ano 39.45 seconds nung 400m human sprint asemteta alima otsü tasen ka yangluogo. Beijing nung 2nd World Humanoid Robot Games nung Honor Robotics D1 (Lightning)-i 400m finals nung takok ngua world record tasen yangluogo.

Dikhow River nungi lung o lisem agitetba aser Nagaland nung nakmati atuba ajanga Upper Assam nung tzümetsüng ajuru: ABSU**Kokrajhar, August 25, 2026**

(Agencies): Dikhow River nung lung aser lisem agiteta agiba aser Nagaland tenemlen nakmati atuba ajanga Upper Assam nung tzümetsüng timtem tulu ajuru ta All Bodo Students' Union (ABSU)-i tai tongloktüsügo.

August 24, 2026 nü Kokrajhar nung osangbener senden ka amendang ABSU President Kwrwmdao Wary-i iba onük jembi.

ABSU relief team-i tesüiba anogo tugu tashi Sivasagar district nung tzümetsüng agi

kongshiba yimtsüng tugu nung kibong 209 nem teyari agüja liasü. Parnoki ki nungi jana endoktsü, raksar aliba kitem yanglushitsü aser aluyimertemi alu inyakba nung yaritepa liasü.

Centre aser Assam sorkartemi Upper Assam nung tzümetsüng agi kongshia alir nem teyari shitak agütsütsüla ta ABSU President Wary-isa ashi.

Dikhow River nung lung aser lisem aika agitetba aser Nagaland nung nakmati atuba ajanga iba tesem nung lendong tulu bentsür aruogo. Onoki field-level observations asüba ajanga

Centre aser state sorkartemi policy tajungtem yanglutsü aser scientific maparen inyaktsü nüngdakba ajitetogo ta paisa ashi.

Sivasagar aser Charaideo district tem nung tzümetsüng agi kongshirtem nem relief, rehabilitation aser reconstruction of houses shitak inyaktsüla ta ABSU-isa takhangba agütsü.

Iba senden nung ABSU General Secretary Khanindra Basumatary aser Assistant General Secretary Dinesh Brahma na aden.

IPFT-i Sixth Schedule Day nung Tipraland statehood nenshi**Agartala, August 25, 2026**

(Agencies): Indigenous Peoples Front of Tripura (IPFT)-i Sixth Schedule Day tenüng nung Agartala nung rally ka aser public sentong ka ayongzüka agiogo. Iba mapang parnoki Tipraland state balaka akümtsü takhangba nenshiogo.

Mara Chowmuhani nung ayongzüka sentong nung IPFT lennirtem, züngsemtem aser

pusemertem aden. Iba ya magidang parnoki North Gate area nungi tenzüker Agartala kübok tesem balala sema rally agia liasü.

Sentong nung IPFT lennirtemi Tipraland ola maneni adok. Tripura nung lisopur kintem temetentem, taginübatem aser maitsü kümzüka ayutsü atema constitutional safeguards

nüngdaker ta parnoki ashi.

Parnokisa Sixth Schedule ajanga lisopur kümzüka ayuba aser ketdangsüba indang jembi.

Iba sentong nung IPFT president Prem Kumar Reang aser Tripura minister Shukla Charan Noatia nati anir tanishirtem aser pusemertem aden.

Tripura nung IPFT ya BJP-i aniba sorkar nung dena lir.

NFR-i Hill Section nung Train Services melenshir**Maligaon, August 25, 2026**

(TYO): Northeast Frontier Railway (NFR)-i New Harangajao station anasa railway tracks (Line-1 and Line-2) yanglushiba mapa maneni inyakdar aser iba atema train services nung temelenshi aliba metetdaksüogo.

Iba maparen ajanga Lumding-Badarpur Hill Section nung Line-3 ajanga dang train senzür aser train services nung temelenshi lir ta Chief Public

Relations Officer Kapinjal Kishore Sharma-i sangdong ka nung ashi.

Cancellation of Trains:

Train No. 15617 (Guwahati - Dullabcherra) Express - 26.08.2026 nungi apusotsü aliba athir.

Train No. 15618 (Dullabcherra - Guwahati) Express - 27.08.2026 nungi apusotsü aliba athir.

Train No. 15615 (Guwahati - Silchar) Express - 26.08.2026 nungi apusotsü

aliba athir.

Train No. 15616 (Silchar - Guwahati) Express - 27.08.2026 nungi apusotsü aliba athir.

Rescheduling of Trains:

Train No. 15650 (Narangi - Agartala) Express - 26.08.2026 nü Narangi nungi 18:30 hrs nung apusotsü.

Train No. 15646 (Silchar - Charlapalli) Express - 26.08.2026 nü Silchar nungi 22:10 hrs nung apusotsü.

Arunachal Pradesh nung NSCN (IM) züngsem ka apu**Dibrugarh, August 25, 2026**

(Agencies): Assam Rifles-i Arunachal Pradesh Police den joint operation ka inyakdang NSCN (IM) züngsem ka apu.

Tirap district kübok New Paniduria nung mita aodang parnoki NSCN (IM) nung private Wangchan Wangsu apu. Osang tejangja kar

angazükba sülen iba operation tenzüka liasü. Sepaitemi pa ket nungi pistol ka, magazine ka aser injang ngutetogo ta IGAR (North) ajanga sangdong ka nung metetdaksü.

NSCN (IM) züngsem Wangsu ket nungisa Rs 5,450, nisung balala indang Aadhaar cards asem, Voter ID card ka,

phone number list ka aser torchlight ka ngutet ta parnokisa ashi.

Security force aser Arunachal Pradesh Police tsüngda amalitepa telungpur maparen anema inyaka arur aser Tirap district o temeket nung tensa süngjema ayur ta Assam Rifles-isa metetdaksü.

Rohingya nunger refugee temi Cox's Bazar nung longkak ait

Dhaka, Luroi/August 25 (Agencies): Bangladesh nung camp tem nung talitsü jenjang majungba anema Rohingya nunger refugee meyirejang aikati longkak aitogo. Parnok libaliro jenjang tajungba küma yanglushitsütsü atema international teyari talila agütsütsü takhangba agütsüogo.

United Council of Rohingya refugee group-i ashiba agi, Rohingya nunger samatsütsü merangba bilemtettsü aser Myanmar nungi jena or küm teku ajungba mapang tang humanitarian crisis balala adoker aliba metetdaksütsü atema parnoki iba longkak

aitba sentong ya ayongzüka agiogo. Rohingya nunger million 1.2 tang Bangladesh kübok Cox's Bazar nung camp 30 nung lidar. Parnok ya timba 2017 küm Myanmar nung military-i parnok anema jenjang agiba mapang jena aoertem lir.

Senotsü teyari, ration ajema akümba den service tem agintsüba sülen camp nung alirtem jenjang tamajungba küma odar, ta aid group temi ashi.

Aid organisation Oxfam-i, humanitarian teyari ajema agütsüba ajanga Cox's Bazar nung tang kechi ajangzükteta ali iba ya tejemba

kümdaksütsü ta tekümdangtsü metetdaksüba den tenüngdakba service tem tang kanga nongshiba mapang lir, ta shisem.

Cox's Bazar nungi Al Jazeera osangbener Tanvir Chowdhury-i ashiba agi, longkak aitertemi alima kintem nem parnok takhangba angashidaksüner.

"Parnoki ochi obendang aginer aser kidangi teküzmükba kübok meyipa oner," ta pai ashi.

Bangladesh nung ketdangsürtemi, teyari agütsütsü atema parnok tashi ajema kümogo ta ashiba den, Rohingya nungertem pei kidangi meyipa yoktsü ayongzükogo.

Iran-i US sanctions den kasa tokteptsü nangzüker

Cairo, Luroi/August 25 (Agencies): US-i Iran rongsenketzüng azüingmeyaka yutsütsü nükjidong nung sanctions tesashiba agütsüba anema tokteptsü Iran-i nangzüker aser trading partners tulu temi nokdangtettsü tamang akar aser Washington-i jembishinü asendenshiner ta ashir.

Rara tenüker ita trok tajunger aser US-i tang tashi benteta moteter, aser Treasury Secretary Scott Bessent-i Hombarnü mera kar sangdong saka temerenshi sanctions tesashibo magütsü.

Iran den maneni shishilempaba linüktem 'dollar-based financial system' nungi ainshidaksütsü ta pai ashi saka mapang tatakzük magütsü mesüra koba nung tenük yoktsüar mejangjatsü, aser totuyuba tasenba sülen anidaksü atema mapang agütsütsü ta ashi.

Iranian parliament nung foreign relations committee tekolakba Abbas Golroo-i ashiba agi, Pakistan army chief Asim Munir-i Hombarnü Iran nem US nungi yokba osang agütsüogo.

"Nükjidong tongtibaji anena aliba yimten inyakyim asendenshiner amai lir," ta pai ISNA news agency dang ashi.

Treasury Department-i kija, entities aser rong 60 asoshi sanctions tasen sangdong saka yangji Iran indang totzü shishilempaba nung yarir ta temulung melemi aliba Chinese financial institutions kata mali.

Chinese banks indang asüngdangba langzüdang, "US sanctions agi matongtsüsa shinga mali ta tanü onoki jangjatsüner," ta Bessent-i ashi.

Küm aika Iran indang totsü timba China-i alia arur, aser Washington-i July ita tiyonglen nungi Iran nunger rongnendak tesemtem mokdangba sülen

China-i Iran nunger totsü aoba ajema kumogo.

Taruba ita Tir Donald Trump aser China Tir Xi Jinping jembishinü akatsü imlaa aliba mapang China indang banks nung sanctions agütsüra Beijing-i tayang kepzüksü US-i shisabolur, kechiaser China nungi tongtipang minerals bener aoba azüokra timtem asütsü.

Mongulbarnü China-i Iran den tesendaktep ya international law indang framework nung aliba ama lir aser yangji teka mesangshitsüla mesüra timtem magütsütsüla ta ashi.

Kasa mapang Oman Ash Shishah northeast tsütsü kilometer 17 shi pilar mejangjaba projectile kati Mongulbarnü oil tanker ka nung kongshia raksatsü, koba Strait of Hormuz tepang nung lir, ta United Kingdom Maritime Trade Operations ajanga ashi.

Sanctions tasenba sangdongba sülen, Iran-i telangzüba agütsütsü renema lir, ta Iranian Economy Minister Ali Madanizadeh-i ashi.

"Ozü defense ya joko defensive masü; tsükchir temi amakba atatsüla," ta pai state television nung ashi. US mera ya China-ia magizük aser Russia-ia magizük, anungji tanga linük temia magizüktsü, ta pai ashi.

Hopta ishika US mesüra Iran-i kanga sashia amakba mali, saka Iran indang Islamic Revolutionary Guard Corps odongtar Brigadier General Hossein Mohebbi-ibo, Iran indang infrastructure nung timtem agütsüra US tejangraba aser energy checkpoints kanga sashia raksatsütsü, ta nangzüka lir.

US aser Israel nati February ita Iran dak maka tenzüka rara tembangtsü

nükjidong nung Iran aser United States tsüngta June ita interim deal ka zülutepa liasü, saka kanga kera raksa aser Iran-i rong tem dak maneni amak, anungji Gulf nungi totzü abenba kanga junga azüoktet.

Tensa tali tamajungba mekumdaksütsü aser Strait of Hormuz tanaben lapoktsü nung rangloker Tehran den tang tesüsa jembishinüba nung terenlok tajung lir, ta Pakistan-i ashir.

"Onok jembishinü tajung liogo," ta Munir meina Tehran-i aosang Pakistani Interior Minister Mohsin Naqvi-i X nung ashi.

Iran tir indang office nung ketdangsür Mehdi Tabatabaei-i social media post ka nung, Munir-i Iran semdangba ajanga yimtenren tsütsü jenjang tulu aketba takok nguogo aser iba osang yakta temai adoktsü, ta ashi.

Pai rasaa mashi, saka State Department document ka nung, rara mapang US diplomats tem anizüker arua aliba Middle East leni tan hopta meyipa yoktsü akok, ta shia liasü.

November ita US nung midterm elections agütsü lia nüburtemi Trump sapuba ajema kumogo aser rara maginer timba akumer.

Hombarnü Strait of Hormuz ajanga totsü barrels 5 million bena liasü, koba rara metenzükdang anogo shia barrels 20 million dak tema bena liasü.

Iba rara nung nisung meyirijang aika süogo, aser itemji timba Iran aser Lebanon nungi lir. Iran mitkar tashi kanga ajemtsüogo aser rongsenketzüng jenjang kanga mejungi lir.

Ajisüaka Iran-i Gulf nung kidanger linüktem amaktsü akoker aser totzü abenba rong tem amokmerener.

UK drone factory tem amaktsü akok: Kremlin adviser



UK Ato Kilonser Andy Burnham-i Ukraine semdangba mapang Ukraine Tir Volodymyr Zelenskyy salemba angur.

Moscow, Luroi/August 25 (Agencies): Ukraine-i yoktsü atema United Kingdom nung drone yangluba factory tem mejangjaba source temi amaktsü akok, ta Kremlin adviser kati ashi. Britain-i Kyiv den long-range missile blueprint tem lemsateptsü atema mulunga agizükba sülen tang iba tekümdangtsü ya metetdaksüogo.

UK Ato Kilonser Andy Burnham-i Ukraine semdangba mapang Kremlin adviser aser taoba mapang deputy foreign minister Andrei Fedorov-i, British broadcaster BBC dang Mongolbarnü ashiba agi, Britain anema "semi-military" jenjang karbo agütsü akok, ta ashi.

Burnham-i Hombarnü Kyiv semdangba mapang UK-i Ukraine den French-British designed long-missile drone tem yanglutsü atema missile blueprint tem lemsatepogo. Russia nunger adviser yagi ashiba agi, item blueprint tem lemsatepba ya Russia-Ukraine rara nung UK-i indang indanga shilem agiba ama Moscow-i agizüker

Fedorov-i ashiba agi, o agidang masü saka Russia-i UK anema memenoi jenjang agütsü akok.

Iba indang tajungba rasa ashitsü asüngdangba mapang pai, "technical tsütsü telangzüba agütsütsü akok mesüra mejangjaba source ajanga hacker temi amaktsü akok, saka

iba ya official jenjang nungi masütsü," ta ashi.

"Yimden yimsüsüba tsütsü jenjang balala agiba asütsü akok aser semi-military jenjang dena agütsü akok.

"Tatishitsü agi enterprise aser Ukraine atema drone yangluba factory tem dak langka kar ataloktsü akok," ta pai ashi.

Kremlin otongdar Dmitry Peskov-ia Hombarnü osangbenertem den sensaksemba mapang, missile teyari agüja UK iba rara nung shilem agir aser mi nung totzü enoktsür, ta ashi.

Iba dak sendakba nung Burnham-i Kyiv nung osangbenertem den sensaksemba mapang, mi ya shibai tama aputet, ta asüngdang. Russia-i 2022 küm February ita nungi Ukraine amak tenzüka liasü.

UK-i, Scalp missile atema British-made components asoshi blueprints tem declassify asütsü atema mulunga agizükogo. Iba missile ya France indang Storm Shadow missile vresion ka lir, koba Russia nung tesem balala amaktsü atema amshia arudar.

Iba Scalp missile yagi bunker amala kanga junga yanglur aliba target tem makteter. Missile range ya km 240 shi lir.

Ukraine-i, küm tem tsüngda Russia amaktsü atema sen dalang agi yangluba drone tem timba yanglua arudar.

Office of the
Mangmetong Village Council
Mokokchung, Nagaland

SANGDONGER

Mangmetong lushi nung 26 August, 2026 anogo nungi prangpong (Air gun) mamshitsü özüng sangdonger. Tashi mangar dang temerenshi tulu alütsü.

Sd/-
Watitemjen
Chairman

Kikatamba
Secretary

DECLARATION OF NAME CHANGE

I, **KETHOSINO KIRE**, D/o. Late MIAKHRIELIE MECHIEO resident of H. NO 976, Lane-17, Kuda 'C' Half Nagarjan, Dist-Dimapur, State-Nagaland, do hereby declare that I have changed my name from KETHOSINO KIRE to KETHOSINO and henceforth I shall be known as **KETHOSINO** in all purpose, vide affidavit no 648/2021 sworn before the Notary Public at Dimapur, Nagaland on 8th March 2021. KETHOSINO and KETHOSINO KIRE both are same and one Identical person.

Neingulie-i AFI Commentators Workshop nung shilem agi



Dimapur, Luroi/August 25 (TYO): Nagaland Athletics Association-i sangdong ka ajanga, Nagaland tenüing nungi Nagaland Athletics Honorary Treasurer, Neingulie Nakhro AFI Commentators Workshop 2026 nung shilem agiba metetdaksüogo. Iba workshop ya Kalinga Stadium, Bhubaneswar nung August 20 nungi 22 tashi agia liasü.

Anogo asem aiba workshop nung ya shilem agitsü atema

Nagaland Athletics Association Nakhro shima liasü. Linük ajunga nungi athletics commentator aser announcer tem professional ecosystem tashi tait ka amenoktsü atema Athletics Federation of India-i jenjang agia aruba nung iba workshop ya-a shilem ka liasü.

Workshop ya alima nung nüngtugu broadcaster Richard Newman aser Olympic medallist aser Emmy-winning broadcaster Shannon Rowbury

nati anir agia liasü. Sentong nung shilem agitem nem live commentary, World Athletics Continental Tour Silver, Bhubaneswar 2026 nung in-stadium announcing densema athletics broadcasting dak sendakba nung tangazükba balala agütsü.

Workshop mapang tongtibang sentong kaji Kalinga Stadium nung practical session ya liasü. Iba ajanga workshop nung shilem agitem nem international athletics asayamung mapang osang tsüsang metetdaksüba yimya balala sayua ajangshidaksüba den iba amala sentong asoshi renemtsü atema tangazükba agütsüogo.

Iba session ajangsa linük 20 nungi asayar 180 adenshia asayaba mapang asayatem tasayadak nung professional commentary aser announcing dak sendakba nung takhangba tem angatetsü aser ajangshitsü asoshi maongka agütsüogo.

Association-isa, iba workshop nung takok ngua shilem agiba atema Neingulie Nakhro nem tenüingsang agütsüba den iba maongka agütsüba asoshi Athletics Federation of India dang kanga pelaba lemsatepogo.

19th Imchaba Master Memorial Nagaland Open V/ball Tournament Sept 22-25 asayatsü

Mokokchung, Luroi/August 25 (TYO): 19buba Imchaba Master Memorial Nagaland Open Volleyball Tournament 2026 taruba September ita 22 nungi 25 tashi yangi Multi-purpose indoor stadium Mokokchung nung asayatsü lemtetogo, ta tayonger Mokokchung District Volleyball Association (MDVA)-i sangdong ka ajanga metetdaksü.

Iba ya Nagaland open tournament ka lir. Taküma iba asayamung shir teloki bendir senpet sen Rs. 1,00,000/- (one lakh), tanbuba nem Rs. 70,000/- (seventy thousand), tasembuba aser pezübuba jenjang nema Rs. 30,000/- (thirty thousand) aser Rs. 20,000/- (twenty thousand) senpettsütsü.

Iba den külemi nija senpet (individual awards) itemi shima agütsütsü - Best Spiker, Best Setter, Player of the Tournament aser Emerging Player. Iba den semifinalist team pezü dak alaka telok shia nem shilem agiba teyari Rs.

5000/- (five thousand) agütsütsü, ta osang ajangasa metetdaksü.

Iba asayamung nung shilem agitsü jangrar atema Registration maparen 1st September 2026 nungi tenzüksü. Form meyiptsütsü atema tesüsabuba anogoji 16th September 2026 asütsü aser 19th September nü fixture yanglutsü, ta osang ajangasa ashi.

Iba asayamung nung shilem agitsü atema telok 16 dang agitsü. Anungji, registration atema mezüing arur nem tama maongka agütsütsü. Registration-ji Google Forms yimya nung agitsü, ta tayongertemisa metetdaksü.

Iba asayamung dak sentakba nung osang tejanga metetnürtemi item mobile number - Temjenlemba (7005027675), Organising Committee Convenor (8119077064 / 9402013597) mesüra Akangnukshi (961293872) den tongteprateptsü akok, ta osang ajangasa metetdaksü.

Kohima nung F1® Sim Racing India Open 2026 ayongzüka asayatsü



Dimapur, Luroi/August 25 (TYO): Tech X Gaming (TXG) Expo Nagaland 2026 nung shilem ka ama Nagaland Esports Society-i ayongzüka tang mezüingbuba F1® Sim Racing India Open 2026 - Kohima round asayatsü. Official F1 game ajanga linük ajunga nung sempet aketertem anitetsü aser atsüa arutsü nükjidong nung iba championship ya tenzüko.

Sentong ya NBCC Convetion hall Kohima nung August 28 aser 29 nü agitsü. Asaya ya juniors aser seniors ta category ana küma lemsar asayatsü. Linük ajunga nungi asayar 1000 shi shimtsü aser final round atema parnok Mumbai-i ajatsü.

Osangbenertem den sensaksemba mapang Mumbai

Falcons Racing Limited nungi Ishaan Bhataya-i ashiba agi, Falcons Racing Limited-i Tech X Gaming Expo 2026 mapang F1® Sim Racing India Open 2026 Kohima round achaayanga agitsü. Iba ya India nung mezüingbuba official Formula 1R-sanctioned national sim racing championship lir, koba sim racing ajanga motorsport nung lanurtem anitetsü aser jangjatsü atema ayongzüka lir.

Kohima nung iba asayamung ayongzüka asayaba ajanga official Formula 1(R) linked platform Nagaland-i bener arutsü aser iba ajanga lanur racer aser gamer tem nem national jenjang nung tokteptsü atema maongka agütsütsü. Iba ajanga esports ya motorsport, technology aser tarutsü career den sendakteptsütsü.

Maneni asayamung ajanga Nagaland nung digital aser gaming ecosystem kanga kara renlokyonga oya aliba aser gaming o technology ya tang kanga renloka oya aliba industry ka ta sayutsü.

Anogo ana agitsü aliba expo ya gaming, esports, technology, artificial intelligence, digital creativity aser tang renloka oya aliba digital industry tem benjungtsü atema lir, kong tetektepba den workshop aser exhibition tem ayongzüka agitsü aser sabang ka kübok pei tajangshibatem lemsateptetsü.

F1™ ® Sim Racing India Open 2026 atema ajak senteper senpet sen crore 2 agütsütsü aser takoker Mumbai Falcons Racing Limited indang "One in a Billion Hunt - Agla Star" nung shilem agitsü maongka angutsü.

Tottenham-i £75m agi Savinho alizükogo



Luroi/August 25, 2026 (Agencies): Tottenham-i Manchester City nungi Brazil nunger winger Savinho pound million 75 agi alizükogo.

Arisi küm 22 tain asayar ya Spurs den mapang talangka atema tenangzüktepba yangluogo aser Roberto de Zerbi-i aniba team yagi ano pa atema add-ons pound million 10 agütsütsü akok.

Savinho ya Spurs puri mapang talangka nungi alizükünä liasü. Taoba küm pa atema bid asüba City puri magizük.

Savinho-i Etihad Stadium nung dang asayatsü shim, saka Pep Guardiola kübok pa taoba season aibenbo asayatsü maongka mangu aser Premier League nung tenetben dang tetenzük nungi asaya liasü.

"Mapang tatsükabo agiogo, saka ni idaki aruba atema pelar," ta Savinho-i ashi.

Savinho ya 2024 küm

French club Troyes nungi pound million 30.8 agi City puri alizük aser pa club tenüing nungi 84 ben asayaogo. Iba mapang pai goal tenet idaktsü aser assist 16 süja liasü.

West Ham nungi Mateus Fernandes, Newcastle nungi Sandro Tonali aser Brighton nungi Jan Paul van Hecke nunger pound million 312 entoka alizükba sülen Brazil nunger asayar ya tang Spurs nung denogo.

Spurs purisa defenders Marcos Senesi aser Andrew Robertson na aser goalkeeper Martin Dubravka nunger free transfer nung anir aruogo.

Kasa mapang nung City pur ano Spurs dang Egypt nunger forward Omar Marmoush ayoktsü atema tang sensaksemdar, aser source balalai ashiba agi, September 1 matong tsüngda club ana tsüngda tangatettep ka dangi arutsü imlar.

BILEMDANGANG

"Tepela aser tejashi ajak teti asoshibo masü."